

卷一

疫證集說

陸潤庠題籤



午 11
86
共 4 册

疫澄集說

張
謩
書
端

宣統辛亥六

月素盦初刊

序

比年以來鼠疫之勢東漸蔓延於全國自去歲至今綜覈各省防疫之費不下千萬亦一時鉅災也嘉定余君伯陶既著鼠疫抉微一書備載治法以爲先事豫防之資余爲序之行於世復搜集古今論疫諸書最錄其方論並歷攷經史百家紀載疫證之說以爲引證成疫證集說以餉世人夫醫術之良楛不外乎用藥之當否自世之人以鼠疫爲非吾國所有也則羣趨於西醫以吾國之醫士爲不可恃風土不同藥餌之適宜者各異強已同人往往有用藥不慎致殆者庸衆不察轉相驚擾不亦愼乎是故治事者

貴操其本而醫術猶然見異思遷率焉不察貿貿然舍已
徇人安得不敗是編採輯多吾國舊說變化神明以爲知
新之助庶幾可以息殃注之奇慘祛見異之陋習乎且疫
癘之作沴氣所萃名目繁衍莫可究測是書搜摘詳備探
本窮源不獨鼠疫一端可以藉資趨避凡屬疫癘固無不
槩括矣當世不乏善醫然多自閔其說不肯示人即志於
傳世而言之無文或不可以行遠然則余君此作豈僅醫
理精微其救世之誠與嚮學之力固已迥出時流萬萬也

宣統辛亥三月既望西林岑春煊

序

嘉定余伯陶先生既著鼠疫抉微一書風行於海內乃復
薈萃羣書之有涉於疫證者刺取其論辯治法都爲一編
名曰疫證集說書成郵以眎余取而讀之上下今古蒐采
靡遺由廣大以致精微攷源流以窮正變先生於茲事可
謂用心苦而致力勤矣夫衛生不講癘疫乃興先事豫防
誠爲最要然病已中於人身則惟恃治之之有術使醫者
不能考察病源研究治法漫然從事幾何其不殆哉粵省
頻年患疫羅斯厄者殆未可以計數比又見端於遼瀋蔓
延於畿輔齊魯而滬上一隅獨以無恙雖由防禦之有方

母亦先生救治之力歟嗟夫鼠疫之爲患於粵久矣顧無能爲之研究剖析先事預防至於治之無術則委咎於地氣劫運使然夫豈然哉使操刀圭者各取是編神而明之有補於人民生命者夫豈淺鮮然則是編固不僅治疫之指南抑亦挽救世患之一端矣

宣統三年二月海豐張鳴岐識於兩廣節署

叙

嗚呼今日之世界跬步皆危途也海有航路陸有鍊軌如網如織星羅棋布而所謂空中飛艇者極中西人士之研精覃思亦駸駸有絕塵飛馳一日千里之勢科學日精交通日速凡物質文明漸被之所能及者殺人之機械不啻載之以俱來是故疫癘之害自昔而有之稽之史傳小之爲一邑一鄉之厲大之亦不越一郡一州之間未有如朝發乎崑崙夕被乎南海暫息於亞東已達於歐美蔓延廣而流行速至今日而極者何也古之時道途梗塞舟車濡滯舉凡風雨潮汐之變在在足爲行旅阻於是有百室之邑數十年中無一人能作千里壯遊者老子有言鄰邑相望鷄狗之聲相聞其民老死不相往來者非虛語也南海北海如風馬牛之不相及彼所謂疫癘者亦豈能越天塹而飛來自輪路既通向之累月不達者今且尅期可至而國人遠遊之志因以日富綜通國而計之一日之中熙熙而來攘攘而往者動以億萬數猝有時疫行人染之貨物傳之渺小之生類爲人耳目

所不及覺察者亦能於無形中媒介之於是因一隅而達十數行省由一人而戕
百萬生靈長吏窮補救之術醫師盡治療之方風聲鶴唳劇目忧心噫嘻岌岌乎
危哉疫之爲厲也夫交通便利所以增進世界之文明必爲因噎廢食之譚雖至
愚者決不出此然則防其微而杜其漸俾之不能爲害者其責端在良醫嘉定余
君伯陶懸壺海上錚錚有聲歧黃家咸推重去年滬上有鼠疫之謠曾編鼠疫抉
微一書識者矜爲創獲君之意以爲鼠疫者不過疫之一端其他足以殺人者正
復無窮爰哀集古今來論疫之說治疫之方薈爲一書名曰疫證集說問叙於余
余於醫理素未問津獨念處此交通之世其危更甚於往昔君此書足以防患於
未然爲功誠非尠也爰爲之率書數語弁之簡端云同郡唐文治謹叙

序

伯陶余君輯鼠疫抉微一書余既爲之序矣未幾又以疫證集說相商權爲之攷訂其部居審擇其去取閱五月書成又屬余序余慨然曰天下傷人之事物孰有甚於疫哉說文疫民皆疾也釋名疫役也言有鬼行役也一方患疫少自數百人多至數萬人往往死亡相藉人人自危在昔閉關時代鄉邑患疫不至延及都會此省疫作未必竄入他省近則道路交通凡舟車所至之地皆爲疫癘可至之地去冬哈爾濱疫起不旬日而至奉天而津沽而京城其死亡之多既可悲其流行之速尤可懼西人畏疫甚故防疫切而研究治疫之法之方更不遺餘力今春奉省開會聚十數國之醫士互相討論西醫咸皇皇焉望其報告之書以先覩爲快吾華醫置若罔聞焉嗚呼彼何其熱吾何其冷歟然猶得諉之曰中西異治華醫不能讀西書焉然則吾中國自古相傳論疫之書所載治疫之法之方又何不一研究耶伯陶此書發起在奉天大會以前蓋有見於中西異稟既不能執一以論

治中西殊文又不能舍己以從人故以是書爲同志之先導其用心良厚矣吾觀書中所載諸家論疫各有精義所在雖時會所變病因雜出病情既異病名不同然理法則一由此悟彼道在因時制宜耳即如東晉以前未嘗有脚氣金元以前未嘗有發痧光緒辛卯以前未嘗有鼠疫而今則治脚氣發痧鼠疫之方法皆備矣有一病必有一病之治法法立而後方出焉故方之去病由於法之中病而病因不同法與方又不能不變即以治疫論余師愚以石膏爲主藥而吳又可專用大黃謂石膏不可用二君皆治疫聖手活人無算何以各異其說蓋師愚所治病因由於暑熱暑爲天氣卽仲景所謂清邪中上之疫也又可所治病因由於濕溫濕爲地氣卽仲景所云濁邪中下之疫也清邪乃無形之燥火故宜清而不宜下濁邪乃有形之濕穢故宜下而不宜清二君皆具卓識辨證精斯立法當立法當則處方用藥各得所宜矣余嘉伯陶用心之厚故爲發其大凡焉上海李鍾珏

序

予與伯陶余君相知最深且久因於其素所蓄積與夫平生之旨趨莫不相印於心嘗與上下古今講論蒐討不覺日晷之潛移而媿媿焉終無劾也伯陶抱宏濟之懷匪伊一日恒謂病者生死懸於醫師之手心無正鵠則豪釐千里差謬莫可罄言畧舉相類似而易訛舛者數端縷晰條分確有準的予謂宣之於口莫若筆之於書是宜撰述成編以饜同志迺伯陶過人殊遠自視歆然撝抑虛懷不肯問世予曰著書立說責在吾輩君如見道不任竊恐世之擇焉不精語焉不詳者方且紛淆尤雜災梨禍棗囂囂者若亂蛙之鳴於沼沚焉况疫之陡發捷於諸病治之不能須臾稍緩蓋所爭在瞬息間也不有人焉以指示徑塗恐

醫家病家兩有歧誤邇來南有檢疫之謠北有罹疫之慘
當今醫界執牛耳者舍君其誰君其漠然無所動於中默
然無以表於世乎伯陶由是慨焉有著作之志曰今世必
要之書尙付缺如者厥有數十種若婦幼諸科等編當次
第纂述聊罄夙抱而以疫書發其端蓋亦先其所急云爾
夫伯陶前著鼠疫抉微一冊行世予旣以言弁其簡首茲
復統各種疫證合諸家疫書集爲大成參以精論不數月
而哀然成帙矣至其書之掇要鉤元提綱挈領足以餉遺
海內同志之士讀是編者當知之而能言之不待予之再
贅焉

宣統三年歲次辛亥莫春同里巽侍陳栢

自序

僕賦質庸鈍鑽研故紙者二十餘稔未嘗少輟竊不自揆
蒐討舊聞采擷精蘊一得之見不忍秘默邇日所編鼠疫
抉微既竟又以鼠疫者疫之一名僅輯專書不免掛一漏
萬爰將舊藏百家書中所載曰疫曰瘟與夫一切雜疫辨
證治法彙爲一編名曰疫證集說豈敢自炫其博亦不欲
揜古人之長耳况疫證觸發死亾在呼吸之頃救治爭毫
忽之間名目繁多方法各異苟不劃清門徑流弊曷可勝
言區區之衷不敢局於成見繇是囊括羣言以爲集思廣
益之助俾海內同志於抉微一書而外庶得窺夫全豹勿

貽笑於汗牛云爾

宣統三年歲次辛亥正月嘉定余德堦伯陶

疫證集說

例言

一是書薈萃古今論疫諸書掇其精英凡百數十家錄爲一編名曰
疫證集說

一是書所採方論以先後爲次且將歷代姓名書目註明以便同志
者論世尙友焉

一是書簡擇精嚴而醇駁異同之說不及備載或一人祇取一方或
一人兼採數論未免遺珠之憾閱者諒之

一是書方劑分兩古今不同所載各方概依原書不敢以意改易引
用者當視病之淺深藥之柔峻酌古準今隨時變通

一是書專爲治疫纂輯然疫證瞬息千變治疫之書尤汗牛充棟斷
非臨時所能尋繹凡醫家病家當於暇時緝閱庶知何方可以療

疫何法可以避疫一遇危急便可從容救治不致凌亂無緒區區
之志蓋如是云

疫證集說目錄

卷一

雜俎

古今疫名考

古今論疫諸家考

古今治疫異同論

瘴說

防疫芻言

論疫癘暴亡

論治疫之要首重陽明並辨神經之昏不涉心胞

疫痧條辨

疫痧新方

青萍湯

紫樸湯

蟬翼飲

龍腦飲

羚羊煎

神犀煎

疫痧選方

玉鑰匙 金鑰匙 錫類散 清咽方 治爛喉痧證效方 外治異功散

卷二

素問

選方一 小金丹

難經

傷寒論

小品方

選方三 屠蘇酒 大黃湯 茅根湯

肘後方

選方三 天行虜瘡方 太乙流金散 斷溫疫方

百一方

選方一 神仙解毒萬病丸

病源論

千金方

選方四 虎頭殺鬼丸 辟溫粉 治溫疫方 治溫令不相染方

隨身備急方

選方二 天行嘔碗方 天行虛煩方

外臺秘要

選方十一 連馬通湯 崔氏黃連解毒湯 黃連龍骨湯 廣濟柴胡湯 前胡湯 延年梔子湯 深師黃
天行鼻衄方 近效天行脇脹方 秦芫湯 集驗升麻湯 刪繁大青消毒湯

聖惠方

選方二十五
散 淋頂湯

生葛飲
紫雪法

梔子散
黃雪法

柴胡散
柴胡散

知母散
治山瘴瘧方

大黃飲子
治山瘴瘧不相染方

羚羊角散
射干散

羚羊角丸

射干散

前胡
太陰

玄精丸

治時氣豌豆瘡方

石膏飲子

犀角丸

蘆根飲子

犀角散

麥門冬散

嘉佑補注神農本草

蘇沈良方

選方一 聖散子

傷寒總病論

太平惠民和劑局方

選方一 不換金正氣散

傳信適用方

選方一 香芎散

聖濟總錄

三因方

活人書

選方一 調中湯

仁齋直指

傷寒標本

疫

證集說

目錄

二

素盒刊行

傷要心要 選方一 第一雙解散

儒門事親

病機氣宜保命集 選方一 潔古雄黃丸

內外傷辨惑論 選方一 普濟消毒飲

衛生寶鑑 選方二 漏蘆散 消毒丸

此事難知

瑞竹堂經驗方 選方一 啞瘡咽喉乳蛾方

世醫得效方 選方二 荆防敗毒散 萬病解毒丸

丹溪心法

端效方

外科精義 選方一 通氣散

醫經溯洄集

卷三

推求師意

醫學綱目

傷寒全生集

傷寒蘊要

選方一 犀角大麥湯

醫學正傳

選方二 正傳神朮散 加味敗毒散

經驗良方

選方一 三仙湯

明醫雜著

選方一 清熱解毒湯

韓氏醫通

選方一 運氣五瘟丹

萬氏家抄濟世良方

薛氏醫案

醫學入門

選方四 人中黃丸 瘰癧丸 不換金正氣散 托裏消毒散

度 證 集 說 目錄 三 卷 五 行

醫方攷

古今醫鑒

萬病回春

選方四

二聖救苦丸

牛蒡茶連湯

加味薑黃丸

清涼救苦散

赤水玄珠

傷寒舌辨

醫學六要

壽世仙丹

選方一

紅白散

外科正宗

選方三

連翹消毒飲

五利大黃湯

太乙紫金丹

六科準繩

折肱漫錄

廣筆記

景岳全書

傷寒補天石 選方一 綠雲散

瘟疫論 選方四 達原飲 三消飲 人中黃散 生犀飲

東醫寶鑑

卷四

醫宗金鑑

醫門法律

傷寒翼

張氏醫通

溫熱暑疫全書

石室秘錄

辨證錄 選方一 福建香茶餅

證治要義

痧脹玉衡書 選方二 寶花散 桃仁紅花湯

晰微補化全書

琅環青囊要

河溪醫案

傷寒大白

醫學心悟 選方一 活疫清涼散

金匱翼

疫疹一得 選方一 清瘟敗毒散

廣瘟疫論

傷寒瘟疫條辨

說疫 選方七 人中白散 加減羚羊角散 參連散 金豆解毒煎 六一泥飲 蒼降返魂香 罩胎散

疫痧草

丹痧經驗闡解

痧疫論 選方一 行軍散

醫林改錯 選方一 活血解毒湯

補註瘟疫論

傷寒名數解

傷寒論集成

傷寒論述義

時方妙用

時病論

霍亂論 選方一 蠶矢湯

世補齋醫書

醫存

鼠疫治法

鼠疫彙編

時疫辨

醫醫醫

鼠疫抉微

選方二 鼠疫經驗方 經驗塗核散

補遺

肘後方

怪證奇方

夷堅志

名醫別錄

唐本草

孫真人食忌

千金方

選方一

凝雪湯

本草拾遺

食療本草

梅師方

外臺秘要

日華本草

聖惠方

選方一

絳雪

嘉佑本草

葉氏錄驗方

是齋百一選方

選方一

碧霞丹

雞峯方

醫說

醫方成集

醫林集要

本草綱目

讀醫說

醫效秘傳

選方二 甘露消毒丹 神犀丹

平易方

選方二 臥龍丹 蟾酥丸

霍亂論

選方二 千金丹 飛龍奪命丹

素盦醫話

選方一 消瘟普濟散

檢漏

霍亂新論

卷四二十六頁
目錄

附勘誤表

疫證集說卷一

集古今雜俎八十則 譔文八 譔方六 選方六

嘉定余德壩伯陶手編

雜俎 素盒

周禮天官疾醫職 疾醫掌養萬民之疾病四時皆有癘疾 夏官
方相氏帥百隸而時儼以索室毆疫

禮記月令 季春行夏令則民多疾疫 孟夏行秋令則其民大疫
太公六韜 人主好重賦役大宮室多臺遊則民多病瘟也

呂氏春秋 孟春行秋令則民大疫疾 季春行夏令則民多疾疫
仲夏行秋令則草木零落果實早成民殃於疫 仲冬紀曰發蓋
藏起大冢地氣且洩是謂發天之房諸蟄則死民多疾疫

時令論 反時令則有大疫風欬孰噎虛寒疥癘之疾

疫證集說卷一 雜俎 素盒 刊行

史記曆書 堯復遂重黎之後立羲和之官明時正度則陰陽調風
雨節茂氣至民無天疫

史記 天官書氏爲天根主疫

南越尉佗傳註 高后遺時軍隆慮侯往擊佗會暑濕大疫兵不能
踰嶺

漢書王莽傳注 剛卯以正月卯日作佩之長三寸廣一寸四分或
用玉或用金銘曰既直既觚既方大疫剛瘳莫我敢當

漢書順帝紀 上干和氣疫癘爲災

質帝紀 詔以疫癘水潦半輸今年田租

盧植傳 植上書曰宋后家屬並以無辜委骸橫尸不得收葬疫癘
之來皆由於此

論衡

春秋之時敗績之軍死者蔽草尸且萬數飢饉之歲餓殍滿

道溫氣疫癘千戶滅門

魏志文帝紀 黃初四年宛許大疫死者萬數

魏文帝與吳質書 昔年疾疫親故多羅其災

曹植曰建安二十二年癘氣流行家家有僵尸之痛室室有號泣之哀或闔門而殮或覆族而喪或以爲疫者鬼神所作夫羅此者悉被褐茹藿之子荆室蓬戶之人耳若夫殿處鼎食之家重貂累蓐之門若是者鮮焉此乃陰陽失位寒暑錯時是故生疫而愚民懸符厭之殊可笑也

蜀志朱桓傳 孫權爲將軍桓給事幕府除餘姚長往遇疫癘穀食荒貴桓分部良吏隱親醫藥殮粥相繼士民感戴之

王連傳 諸葛往征南方連諫曰此不毛之地疫癘之鄉不宜以一國之望冒險而行

吳志 建興二年四月諸葛恪圍新城大疫死者太半

三國志賈逵傳注 時太子在鄴鄢陵侯未到士民頗苦勞役又有疾癘於是軍中騷動

晉書武帝紀 咸寧元年十一月京都死者十萬人

晉孝武帝紀 太元五年五月自冬大疫至於此夏多絕戶者

庾袞傳 咸寧中大疫庾袞二兄俱亡次兄毗復危殆父母諸弟皆出袞獨留不去親自扶持十餘旬毗得瘥袞亦無恙

良吏傳 廣州包帶山海珍異所出一篋之寶可資數世然多瘴疫人情懼焉

張華博物志 漢武帝時西域月氏國度弱水貢返魂香三枚大如燕卵黑如桑椹值長安大疫西使請燒一枚辟之宮中病者聞之即起香聞百里數日不歇疫死未三日者薰之皆活

郭璞山海經 董理之山有鳥如鵲青身白喙白尾名禦疫 英山
有鳥焉其狀如鵲其名曰肥遺食之已癘

十三國春秋 晉泰始五年大疫上命醫以駟馬小車馳救療

北史李士謙傳 凶年散穀至萬餘石合諸藥以救疾疫如此積三
十年

南史宋武帝紀 六月都下疫癘使巡省給醫藥

唐書馮盎傳 天下初定創夷未復大兵之餘疫癘方作

張廷珪傳 廷珪上書曰今河南牛疫十不一在詔雖和市甚於抑
奪

陸贄傳 贄既放荒遠避謗不著書地苦瘴癘祇爲古今集驗方五
十篇以示人

楊炎傳 至德後天下起兵因以饑癘

吐蕃傳 山谷常冰地有寒癘中人輒痞促而不害

葉廷珪名香譜 石葉香狀如雲母可以辟疫

宋史仁宗紀 至和元年春正月壬申散通天犀和藥以療民疫

王克明傳 張子蓋救海州戰士大疫克明時在軍中全活者幾萬

人

吳趨漫錄 范文正公所居之宅淩井必先納青木香數斤以避瘟

李石續博物志 海藥本草云降真香主天行時氣燒之或引鶴降

范成大桂海虞衡志 草子卽寒熱時疫南中吏卒小民不問病源

使人以小錐刺唇及舌尖出血謂之挑草子實無加損于病必服藥

乃愈

金史李慶嗣傳 天德間歲大疫廣平尤甚貧者往往闔門臥病慶

嗣携藥與米粉遺之全活者衆

元史 至大元年春紹興慶元台州疫死者二萬六千餘人

皇慶二年冬京師大疫唐志云國將有恤則邪亂之氣被子民故疫元耶律楚材列傳 材從太祖下靈武諸將爭取子女金帛材獨取遺書及大黃既而士卒病疫惟得大黃輒愈

明史 永樂六年正月江西建昌撫州福建建寧邵武自去年至是月疫死者七萬八千四百餘人八年登州寧海諸州縣自正月至六月疫死者六千餘人邵武比歲大疫至是年冬死絕者萬二千戶

正統九年冬紹興寧波台州瘟疫大作及明年死者三萬餘人
成化十一年八月福建大疫延及江西死者無算

正德元年六月湖廣平溪清涼鎮遠偏橋四衛大疫死者甚衆
崇禎十六年京師大疫自二月至九月

葉拙齋筆記 蜀遭獻忠之亂後瘟疫流行有大頭瘟頭發腫赤大

幾如斗又有馬眼睛瘟雙眸黃大森然挺露又有馬蹄瘟自膝至脛青腫如一狀似馬蹄三病患者皆不救

職方外紀 哥阿島曩國人盡患疫內有名醫名依卜加得不以藥石令城內外遍舉大火燒一晝夜火息而病亦愈矣蓋疫爲邪氣所侵火氣猛烈能盪滌諸邪邪盡而疾愈亦至理也

吳震芳談往 崇禎十六年八月至拾月京城內外病瘍瘡貴賤長幼呼病卽亡不留片刻兵科曹良直古遺正與客對談舉茶打恭不起而殞兵部朱希萊念祖拜客急回入室而殂宜興吳彥升授溫州通判方欲登舟一价先亡一价爲之買棺久之不歸已卒於棺木店中有同寓友鮑姓者勸吳移寓鮑負行去旋入新遷吳畧後至見鮑已殂於屋吳又移出明辰亦殂又金吾錢普明同客會飲言未絕而亡少停夫人婢僕輩一刻間殂十五人又兩客坐馬而行後先叙話

後人再問前人已殞於馬鞍手猶揚鞭奮起又一民家合門俱殞其室多藏偷兒二人一俯於屋簷一入房中將衣飾疊包遞上在簷之
手包積於屋已累累下賊擎一包托起上則俯接引之上者死下者
亦死手各執包以相縊又一長班方剪銀蹲下不起而死又一新婚
家合套坐帳久不出啟幃視之已殞于床之兩頭沿街小戶收掩十
之五六凡楔杆之下更甚街坊間乞兒爲之絕影有棺無棺九門計
數已二十餘萬大內亦然天師張真人輯瑞入都出春明不久急追
再入諭其施符噴咒啐經清解眠宿禁中一月而死亡不減發內帑
四千三千買棺一千理藥竟不給十月初有閩人補選縣佐者曉解
病由看膝灣後有筋腫起紫色無救紅則速刺出血可無患來就看
者日以萬計後霜雪漸繁勢亦漸殺閩醫以京銜雜職酬之明春爲
流賊所戕

壤按王肱枕蚓菴瑣語及陳松濤災荒記事皆云崇禎十四年至十六年連年亢旱通國奇荒繼以疫癘大作甚有呼病卽亾其爲暑燥熱毒之氣直入于臟可知醫賸曰瘍瘡卽痧病也然痧亦疫也是疫之又一名非疫之又一種也觀其傳染之速死亾之多吁可畏矣

一統志救疫井在大理府點蒼山下有疫癘者飲之卽愈

王養吾痧書 明末時京師大疫患者有胸腹脹滿生白毛如羊者頭大如斗眼鼻俱沒者有兩腮紅腫痰喘壅塞者呼吸之間死以萬計識者曰此痧症也

章傑嶺表十說 嶺外雖以多暑爲病而四時亦有傷寒溫疫之疾其類不一土人不問何疾悉謂之瘴治療多誤或有一歲盛寒近類中州而土俗素無蚤績冬不衣綿居室踈漏戶扃不固忽遭歲寒則

次年溫疫必興醫者之治溫疫亦當以本法治之而隨風土氣候人之強弱酌宜可也

劉松峯說疫 余家曾有患瘟症者十餘人互相傳染余日與病人伍飲食少進旦夕憂患所不待言而竟免傳染偶一日入疫家即病求其故不得因憶伊時舉家患病余忙亂終日夜來獨居一室閉門焚降真香一塊想以此得力耶

日本書紀 崇神五年國內多疾疫民有死亡者且大半矣

續日本紀 文武元年夏四月壬申近江紀伊二國疫給醫藥療之天平七年自夏至冬天下患豌豆瘡天死者多

九年夏四月太宰管內諸國疫瘡時行百姓多死

是年春疾瘡大發初自筑紫來經夏涉秋公卿以下天下百姓相繼沒死不可勝計近代以來未之有也

續日本後紀 仁壽三年京師及畿外多患皰瘡死者甚衆天平九年及弘仁五年有此瘡患今年復不免此疫

素盞譯要 古希臘梯五西太提斯史曾載西歷紀元二千年以前希臘都域大疫流行是史爲西書誌疫之始

拉丁名疫曰丕斯惕斯又名潑勒卡英美又名潑來克法意德又名丕斯忒俄國又名幕卡日本訛譯德語曰卜斯篤皆拉丁之諧音也古羅馬辯倫醫生曰羅馬於耶蘇降生後一百十四年至一百八十年屢有疫疾

古羅馬賽五脫雪拍令醫生曰西歷二百三十五年羅馬大疫

西歷一千八百七十七年(阿司他堪恨)地方有疫症兩種一名(丕斯的斯梅愛納)一名(丕的斯梅及)(丕斯的斯梅愛納)僅傳染而無大害(丕的斯梅及)寒熱如瘧熱勢甚長須至二十四鐘點或三十

鐘點始退熱度高至一百零七度往往因熱而死

英國哈嘎司醫生曰疫證之惡劣者一名蒲罷斯卽肉核傳染證一名卡朋格爾斯卽癰疽傳染證一名白來克特斯卽黑瘟一名太弗斯卽熱毒傳染證一名斯忒白米兒令卽牛瘟一名蒲罷納克潑來克卽鼠疫一名斯母而拍克斯卽天花

考黑瘟一證乃肺胃二部受毒腸鼻均流衄是證於西歷六百年始發現重者不數時卽斃

太弗斯一證曾經剖驗患病之人腸大而肝小肺與腦部皆蓄黑瘀印度卡爾佛兒醫生曰(煤色怕推米呀)地方一帶泥土穢惡房舍窄小最易生疫凡屋小人多空氣不能流通亦能釀疫如一千六零三年(法勒嘎)村中五幢房屋同住三十三人二人患太弗斯疫而亡延蔓合境醫生染疫而死者九人後醫皆爲裹足同時(矮勒

克)地方患疫諸醫皆不敢往

凡膏腴之地疫症最易發生如(尼羅)(弗拉德)(印度)(法勒嘎)等處遇疫最多

每值疫作之時寒暑表約在八十五度

法國蒲拉特醫生每將患疫者穿過之衣燒化以杜傳染

西歷一千八百三十四年法屬(亞利山大)患疫八月

棉絨皮三種之質最易傳帶疫氣(亞利山大)於西歷一千八百三十五年曾由別處運來棉花帶有疫氣遂致疫證蔓延死亡之數約計九千餘人如一千七百廿年(脫來哀司的)地方疫起亦由往來貨舟傳染損傷之數不可枚舉

地中海一帶往來各口岸於西歷一千七百二十年至一千八百四十六年間共有二十五艘染疫船行至法意通商口岸停泊處延蔓

傷人無算其十艘又遞至（買山利司）口岸即被查出有疫船中之人悉數遷入病院是以（買山利司）一埠獨免傳染

埃及醫院於西歷一千八百三十五年曾以二犯人試驗當將病人所着之衣脫下即令二犯人穿上就此染疫而死

又院中曾將疫屍百餘解剖屍質之含有異氣者必用藥水洗刷防疫之法可謂無微不至

英國倫敦於西歷一千六百六十五年大疫時將衣包寄至（寶利隙）（依愛姆城）衣包帶有疫氣立即傳染傷人無算

尼羅河開理啞醫院於西歷一千八百三十五年曾住染疫者三千人所有床帳衣被隨換隨燒永不存積亦不再用

疫氣惡劣不但與病人同居必傳染如空氣中含有疫氣與人相離百碼以內都能傳染

十四世紀歐洲大疫流行名蒲爾麼利克潑來克即肺瘟全歐遇其害者約二十五兆

十九世紀德國柏林及（維也納）地方有二醫生於檢查疫證時一因誤將染有疫毒之手向袋中取吸紙烟一因髯長不便誤將染有疫毒之手時捋鬚髯皆致染疫而死

古今疫名考 素盦

疫病之來時不分寒暑地不分南北人不分老幼到處傳染病狀一律死亡之數動以百千萬計六合之大五洲之衆談者色變聞者心悸誠爲百病之元凶生民之大厄也周禮方相氏儺以逐疫疫之名古時已有之宋以後又稱疫爲瘟明季又稱疫爲瘟疫間嘗攷之素問遺篇詳載五疫曰金疫木疫水疫火疫土疫木疫亦名風疫金疫亦名殺疫又有金癘木癘水癘火癘土癘諸名漢張南陽論疫祇就

六氣之偏勝名之如偏於寒者卽名寒疫偏於熱者卽名熱疫隋巢元方病源論疫癘類有山瘴殃注等名宋龐安時總病論更從四季定名春有青筋牽夏有赤脉攢秋有白氣狸冬有黑骨瘟四季有黃肉隨症陳無擇三因方又有所謂獄瘟塲瘟墓瘟廟瘟社瘟山瘟海瘟家瘟灶瘟歲瘟天瘟地瘟等名吳又可瘟疫論始將疫之形似者就病立名所謂大頭瘟瓜瓢瘟蝦蟇瘟捻頸瘟楊梅瘟疔瘡瘟絞腸瘟軟脚瘟是也許浚東醫寶鑑又有所謂瘴疫吳震芳談往又有所謂癘瘡瘟者喻嘉言醫門法律由人及物有猪鷄等瘟惜畧而未詳張路玉醫通又有所謂臭毒番沙者陳惠民證治要義以物方人謂牛之脹膽瘟行走不動猶人之軟脚瘟馬瘟徧身腫脹猶人之大頭瘟猪瘟皮起小炮猶人之疔瘡瘟羊瘟腸變紅黑而倒亂猶人之絞腸瘟郭右陶痧脹玉衡書復將瘟痧並列又有所謂刺螫瘟痧地葡

瘟痧劉松峯說疫更將方言收入如葡萄瘟鷓鴣瘟龍鬚瘟蝦子瘟
芋苳瘟版腸瘟脇痛瘟手足麻瘟扣頸瘟又有椅子翻扁担翻王瓜
翻狼招翻蚰蜒翻白眼翻遶臍翻疔瘡翻更有鷓鴣掙烏鴉掙兔兒
掙狐狸掙猿猴掙麻雀掙烏沙掙黃鷹掙羊毛掙長蛇掙纏絲掙啞
叭掙母猪掙老鼠掙奔牛掙海青掙眠羊掙近又有雜疫二種傳染
最烈由人氣地氣死鼠異氣相鬱而成一名喉痧即陳靜岩疫痧草
所謂疫痧玉峯顧氏丹痧經驗闡解所謂丹痧一種卽吳子存鼠疫
治法所謂鼠疫亦名核瘟西醫譯疫統名曰潑來克總之曰瘡曰注
曰瘡曰瘟曰毒曰翻曰掙曰痧曰潑來克蓋名稱雖異而其爲疫則
一也卽仲景所謂人人皆病之疫也茲特彙錄簡端以告閱者

古今論疫諸家考 素盦

考素問刺法本病逸篇實爲論疫之祖自刺法本病二篇脫簡而疫

之一字遂不復見於內經迨明永樂中趙簡王居敬堂本始補刊之
茲考二篇所說五疫之至皆相染易無問大小病狀相似正與六元
正紀篇之遠近咸若傷寒例之長幼多相似者一一可證蓋古時疫
不常作故謂之天行病且疫癘之氣至凶極暴若有邪祟憑乎其間
是以古人製方偏重辟邪圖（張仲景傷寒論）分傷寒時行之異圖
（陳延之小品方）立瘟疫與傷寒溫熱殊異之論（葛雅川肘後方）集
辟溫之法圖（陶弘景百一方）得解毒之奧圖（巢元方病源論）列傷
寒時氣熱病溫病疫癘五類圖（孫思邈千金方）搜羅辟溫諸方較
肘後益多（張文仲隨身備急方）尤能推陳出新（王燾外臺秘要）分
傷寒天行溫病三門羣方彙粹囊括靡遺圖（太宗太平聖惠方）（徽
宗聖濟總錄）俱博而能精（嘉祐補註神農本草）取譬詳贍（沈括良
方）後人附以東坡說今名蘇沈良方（龐安時傷寒總病論）精於運

疫

證

集

說

論

者

家

文

氣論亦奇特(陳無擇三因方)分六氣之疫明辯以析(朱肱活人書)
論治詳於溫燥(楊士瀛仁齋直指)發明病從口鼻而入並得治瘴
之奧(劉完素傷寒標本)長於製方(張子和儒門事親)精於治法
(張潔古病機氣宜保命集)明於辨證(李東垣內外傷辨惑論)長於
消毒方主涼散(羅謙甫衛生寶鑑)(王好古此事難知)均能發揮
東垣餘緒(危亦林世醫得效方)簡而能賅(朱震亨丹溪心法)用藥
頗有巧思(闕名端效方)論治確有心法(齊得之外科精義)論大頭
瘟方論皆卓(王安道醫經溯洄集)分陰毒與異氣之殊(戴原禮
推求師意)辨治瘴與治沙之法(陶節菴傷寒全生集)說理透切(吳
綬傷寒蘊要)獨得先後緩急之宜(萬密齋萬氏家抄濟世良方)能
窮汗溺傳染之理(虞天民醫學正傳)(薛立齋薛氏醫案)論均精細
(婁全善醫學綱目)綱舉目張要言不煩(王節齋明醫雜著)(李梴醫

學入門論瘴論疫最爲詳博(吳崑醫方攷)審方論藥獨具手眼(龔信古今醫鑑)(孫東宿赤水玄珠)均能參以治痰之法(韓飛霞韓氏醫通)(龔廷賢萬病回春)所製治疫之方均能以少勝多(張三錫醫學六要)分燥濕之異宜(陳實功外科正宗)辨時毒之順逆(王肯堂六科準繩)直追宋賢(繆仲醇廣筆記)克闡醜鬱之法(張介賓景岳全書)(黃履素折肱漫錄)均議論長於方藥(戈存橘傷寒補天石)分別類證獨闢門徑(吳又可瘟疫論)爲瘟疫專書之祖能發古人未發之蘊至今治疫家奉爲圭臬也(申斗垣傷寒舌鑑)別有精義(許浚東醫寶鑑)彙錄諸方採摭宏博(國朝) (御定醫宗金鑑)各種瘟疫附見於幼科心法一篇(喻嘉言醫門法律)邪分清濁治分三焦(蔣示吉傷寒翼)治胃諸條頗醜扼要(張路玉張氏醫通)癘毒穢氣名尤新穎(周禹載溫熱暑疫全書)(陳士鐸石室秘錄)與(辨證錄)均

能簡練切當（陳惠民證治要義）以物方人理想獨闢（陳太初瑯環青囊要）能使閱者了然於心（郭右陶痧脹玉衡）（王養吾析微補化全書）復將一切雜疫統於痧證（秦皇士傷寒大白）燥溼表裏辨別甚清（程鍾齡醫學心悟）分其來路去路深得治疫綱領（尤在涇金匱翼）分治疫五法（戴北山廣瘟疫論）列辨證五條（劉松峯瘟疫論類編）暨（說疫）雜疫諸名搜羅獨富（徐靈胎蘭臺軌範）可謂取法乎上（楊栗山瘟疫條辨）（雷少逸時病論）各有所長（陳靜巖疫痧草）始詳疫痧證治（玉峯顧氏丹痧經驗闡解）不無心得（洪吉人補註瘟疫論）（蔣寶素醫畧考）引典均博（沈芊綠尊生書）（林羲桐類證治裁）皆係述古之作（王清任醫林改錯）創立治痧之法（山田正珍傷寒集成）超然遠覽剖皙入微（丹波元簡傷寒廣要）及（傷寒述義）酌古準今空前絕後（陳修園時方妙用）亦足發揮程氏心悟之言（余

師愚疫疹一得暑疫方論膽識俱到（王孟英霍亂論）紀律嚴明確
有見地（陸九芝世補齋醫書）辨析傷寒溫熱瘟疫界劃分明（羅芝
園鼠疫彙編）辨證精卓尤能化裁古方（王漢皋醫存）融會古今語
極斬絕（姚梓欽霍亂新論）取舍有法其他名著凡於疫不相及者
或載而不詳者概不採入管窺所及掛漏猶多尙希大雅訂正

古今治疫異同論 素盒

上古洪荒始奠地曠人稀陽氣潛微陰寒滋盛病者寒多熱少故熱
病統於傷寒中古以還生齒日繁人烟稠密濁氣蒸鬱熱病居多惡
臭穢氣往往釀而成疫是以傳染病統謂之疫非天地變遷今昔有
異實緣寰區之大竟有人滿之憂紀曉嵐先生詩曰萬家烟火暖雲
蒸銷盡天山萬古水可謂釀疫之證矣古時疫既鮮少治疫初無專
書或以疫病爲天行或以時氣爲鬼役而凡製方主治僅事辟邪自

秦漢以迄晉唐大率類此。宋季以溫法著效。金元以涼散擅長。迨明之吳又可始著專書。又發明幕原之理。國朝喻嘉言論三焦。王養吾論痧症。劉松峯論雜氣。余師愚之主熱。王清任之主瘀。各抒卓見。以成一家。從此治疫之方。釐然大備。嶺嶠地溫溼重。而多瘴癘。近廿年間。又盛行鼠疫。羅芝園仿通瘀而獲效。雖運會有遞變。疫病無定名。而往古來今。成法具在。究其所以異同之故。神而明之。存乎其人。

瘴說 素盞

玉篇曰瘴癘也。又曰癘疫氣也。是瘴亦疫屬明矣。正字通曰中山川厲氣成疾也。巢源曰山瘴瘧其病生於嶺南。鄭守愚南遊詩云山城多曉瘴。薩真齋閩中詩云海瘴連雲起。大抵南方地熱山川鬱蒸多患毒瘴。劍南避暑漫鈔謂嶺南或見異物從空而墜。始如彈丸。漸如車輪。倏焉四散。人中之卽病。謂之瘴母。且瘴名不一。曰黃芒瘴。見南方

草木狀 新禾瘴 見桂海雜志 二三月曰青草瘴 四五月曰黃梅瘴 六七月

曰新水瘴 八九月曰黃茅瘴 見番禺雜編 蝦蟆瘴 芳草瘴 撲蛇瘴

鎖喉瘴 蛇瘴 見聖濟總錄 冷瘴 熱瘴 中箭 見瘴瘡論 烟瘴 嵐瘴 蚩

蛇瘴 烏蟻瘴 迴頭瘴 黃瓜瘴 攪腸瘴 見管見良方 梅瘴 見撫遺鸚

武瘴 見北戶錄 蚯蚓瘴 見范石湖一百八盤詩 啞瘴 見嶺南衛生方 花風瘴 見醫林

集要 烏脚瘴 見漳州志 人瘴 見使緬錄 炎瘴 楸頭瘴 見體仁彙編 桂花瘴 見泉

州府志 暑溼瘴 毒水瘴 孔雀瘴 江米瘴 見證治大還 額瘴 見湧幢小品

香花瘴 毒淫瘴 見廣東新語 菊花瘴 見粵述 油沙瘴 烏痧瘴 啞叭瘴

見說疫 瘴疫 見東醫實鑑 本草載三人晨行觸瘴飲酒者獨不死 嶺外諺

云莫飲卯時酒 莫吃申時飯 又可見酒之為物能辟瘴以生人亦能

滋瘴以害人 廣韻釋瘴曰熱病是以盧玉川有就中南瘴欺北客 憑

君數磨犀角喫之 句後漢馬伏波在交趾時常餌薏苡以卻瘴 盖病

由溼熱古人所以將犀角薏苡主治

防疫芻言 素盦

避疫之法莫要於自保其身經云正氣存內邪不可干能使吾身不失其固有之健康則八方之賊風四時之異氣自無可乘之隙寢興失時飲食愆度以及逾量之酒失飪之饌又若饅餲餒敗一切腐朽之類一有不慎病卽隨之

未病之人固須恒食新鮮之物或當枵腹之候萬勿接近病人每日須向曠地散步輸換兩間清明之氣然行動不得過勞勞則神疲疲則外邪易觸

每日更宜澡浴不僅潔身去垢有裨衛生且使百脉流通精神充長疫之中人雖四時皆有而夏秋之交受疫尤易者其故有二一因人之肌膚脉絡得寒常斂得熱常弛弛則腠理不密外邪易侵一因烈

日暴暑大雨忽來將塲圃之蒸毒阡陌之朽腐溝澮之臭垢一洗而流入河渠波及塵市則釀疫之媒所在皆是可不懼哉
大凡疫氣觸發由於水之不潔居多近今衛生家恒以汽鍋蒸水沙礫瀝水則水中一切微生物除之務盡亦防疫之一法也
地無論南北時無論炎涼人無論中外得生氣則生得死氣則死死氣者卑下溼鬱朽爛沉悶是也生氣者高爽軒敞精潔雅靜是也天地清明之氣草木暢達之氣山川靈秀之氣皆生氣也西人往往結廬於名山佳島以爲避暑之處亦卽寓避疫之意焉
凡有疫之家不得以衣服飲食器皿送於無疫之家而無疫之家亦不得受有疫之家之衣服飲食器皿
凡有疫人家之衣服器皿每日須以硫黃薰洗以免闔家傳染

論疫癘暴亡 素盒

或問天地六淫之所感卽兩間戾氣之所鍾何以釀而成疫何以傳染若是之易死亡若是之速得毋有邪祟憑乎其間耶余曰非也古人儻以逐疫不過籍以鎮人心順民情耳非真有所謂疫鬼也其一觸卽殞者皆緣人之呼吸出入機關司其職者惟口與鼻口鼻二部最與腦經直接蓋鼻之氣通於腦口之氣通於胃亦通於腦疫邪中人頃刻震撼全腦腦中血管爆裂不待布現病象而人已斃矣此其所以傳染也易此其所以死也速

論治疫之要首重陽明並辨神經之昏不涉心胞 素盦

疫癘之氣自口鼻吸受直入陽明治疫之法當以陽明爲主經云陽明者十二經脈之長又云胃爲五臟六腑之海其清氣上注於目其悍氣上衝頭者循咽喉上走空竅循眼系入絡腦蓋陽明乃一身之綱領爲百病之傳舍醫者能知治疫之重在陽明卽以陽明之藥而

愈陽明之病不使陽明之邪鴟張變幻方克稱職否則陽明之火蒸騰入腦神卽昏矣由是以推則神經之昏明明神經受熱究其神經之熱仍由陽明而來卽經所謂悍氣上衝頭者之明證也且神昏之神係神經之神非心神之神更無所謂心胞之神也一經道破固盡人而知矣

○疫痧條辨 素盒

疫痧古無是名亦時行之一種也嘉慶間虞山陳靜岩始著疫痧草源源本本詳辨甚賅玉峯顧氏著痧喉經驗闡解所論亦精此後金葆三所編丹痧輯要卽從顧氏原書畧增補之惟所收藿香正氣散及挑括等法祇宜治痧氣之痧不可治喉痧之痧而痧迥不相侔引用者未免溷亂殊玷原書曹侯甫喉痧正的論治頗多可取惟首引金氏所載葉天士醫案一條尙欠詳考是證於嘉道間猶不多見自

光緒辛丑滬上盛行之後幾於無歲無之惟傳染未有如辛丑之烈耳諸書所製各方非囿于辛涼卽偏於溫燥要皆難於適用謹補治法數則並製新方六道藉貢採擇

疫痧又名爛喉痧外感時行疫癘內挾伏濕伏熱醞釀而成若感疫者之伏熱重則毒亦重且毒重則喉爛亦重驗喉爛之淺深定疫毒之輕重百無一失

疫痧流行之際毒重者喉爛必深氣穢尤惡一門數口往往連屬而殂或朝入疫家暮已染疫而斃最爲可險凡入疫家先宜飽食乍出疫家不宜遽食蓋飽食則氣壯而邪不外于緩食則氣舒而邪不內蓄

疫痧初起苟能施治得宜何致牽連傳染而治不得法遂致貽害無窮治痧治喉大要不外辛散寒瀉兩法

此正誤驗之談
西點矯詭以為逆

此證輕重懸殊約略可分三種曰順曰險曰逆順者雖外觸時疫而
內無伏邪神不昏迷身熱一二日即布痧子雖不醫治亦得痊愈險
者外有所觸內有所蘊神迷煩熱或痧子未透而咽喉已爛或痧多
毒重逗遛不化或因體虛或夾他證病象雖險治之得法尚可十獲
八九逆者口鼻吸受疫癘與府藏積毒成伍來勢迅烈變幻尤速疫
毒入藏則喉爛入腦則神昏俄頃之間瀰漫藏府氣機為毒所掩血
絡為毒所凝神昏如醉斲睡不醒痧點喫緊不化或紫黯枯燥或嬌
艷異常呼吸短而促舌本絳而紫鼻煤鼻煽六脈或細伏不起或洪
大無根有此惡象多屬不治

疫痧輕重之分亦各隨其人之伏熱多寡而變現焉推其所因厥有
三害一曰過暖一曰煤毒一曰人氣今人喜用鴨絨枕墊及鴨絨被
褥毛絨圍巾非不輕軟適體也蓋於高年火衰則相宜於少壯陽盛

則熱由是而伏矣其害一近時煤油燈煤油爐及一切火爐煤灶用者祇圖利便殊不知毒由是而受矣其害二通商大埠地窄人稠往往一椽同住數家一家聚臥一室租則省矣殊不知呼吸之間空氣不夠輪換炭氣由是而積矣其害三更有房室不節飲食不慎皆爲釀病之媒衛生者所當詳究焉

此證初起先覺四肢痠痛肌膚腫脹雖有大熱而形寒不減按之皮膚隨見白痕者卽疫痧也如無喉證宜服青萍湯若痧疹隱約神煩口渴兼有喉證者宜服蟬翼飲兼吹玉鑰匙若痧疹初見頻頻嘔噦脾胃素有痰溼者宜服紫樸湯痰涎壅塞喉閉不通者兼吹金鑰匙如神迷煩燥癡癩不透喉爛尙淺者宜服龍腦飲兼吹錫類散咽喉腫脹者更須外貼異功散若痧多毒重喉爛漸深者宜服羚羊煎若疫毒凝結喉爛氣穢者宜服神犀煎此方鹹寒瀉火如能多服頻灌

病至危險猶可獲救至於臨時策應諸法皆當隨證加減茲不詳載
幼穉氣弱時疫流行尤易傳染其未曾種痘者受疫更重欲免染疫
則莫妙於早種牛痘近惟牛痘盛行使胎毒早洩而天花之夭枉者
日鮮亦惟牛痘少種致胎毒未清而疫痧之傳染者日多每兒只要
種過牛痘三四次即遇大疫亦能履險如夷矣保赤者幸毋忽諸

疫痧新方 素盒

青萍湯

治疫痧初起丹毒隱隱肌膚腫脹四肢痠痛神迷煩熱等證

紫背浮萍 蟬衣 土貝母 焦米仁 塊滑石

大豆黃卷 牛蒡 蘇薄荷 晚蠶沙 白蒺藜

紫樸湯

治疫痧身熱內挾痰濕胃濁上逆頻頻嘔噁等證

製川樸 象貝母 製半夏 竹二青 大腹皮

大豆卷 白蒺藜 新會皮 雲茯苓 蘇薄荷

蟬翼飲

治疫痧時毒癰癤不透咽喉肢面腫痛及風痰結毒等證

淨蟬衣 冬桑葉 製佳蠶 牛蒡子 象貝母 金銀花

蘇薄荷 荊芥穗 青防風 金鎖匙 連翹心 川通草

龍腦飲

治疫痧隱現神迷煩躁咽喉癰爛及風痰上壅痧火內伏大頭發

頤等證

蘇薄荷 鼠粘子 製佳蠶 京元參 銀花 玉樞丹

冬桑葉 甘中黃 象貝母 馬勃 連翹 鮮石菖蒲

羚羊煎

治疫痧嬌艷逗遛不化風火煽爍神煩搖擗人如中酒時時鼾睡
及喉爛氣穢等證

羚羊片 黑山梔 土貝母 小生地 甘中黃 金銀花

霜桑葉 竹捲心 白蒺藜 連翹心 京元參 鮮蘆根

神犀煎

治時癘疫痧昏閉焦躁齒燥舌裂喉爛氣穢一切危急等證殊有
奇效

暹犀角 石膏 京元參 冬桑葉 連翹 陳金汁

鮮生地 大青 肥知母 竹捲心 紫草 菖蒲汁

另以金銀花露枇杷葉露代水煎藥

疫痧選方

玉鑰匙 仁齋直指

治咽喉腫痛

佳蠶一錢五分
炒研極細

冰片六分

牙硝三錢

硼砂三錢

修合法用銀罐先硼後硝層層間煉如昇拈攀之狀鬆脆為貴置

冷地出淨火氣研細末再加佳蠶冰片以極細無聲為度如咽喉

腐爛者加西黃廉珠孽砂各三分研細併入宜置磁瓶勿

令洩氣

金鑰匙外科發揮

治喉閉纏喉風痰涎壅塞水漿難下

焰硝一兩五錢

硼砂五錢

冰片一字

佳蠶一錢

雄黃二錢

各另為末和勻吹患處如痰涎不出咽喉腫不消急針患處去惡血

錫類散金匱翼

治爛喉痧咽喉腐爛頗有奇效

西牛黃 五厘

冰片 三厘

眞珠 三分

人指甲 五厘

象牙屑 三分
焙

青黛

六分
去灰脚淨

壁錢

二十個
焙土壁磚上者
可用木板
上者不可用

共爲極細末吹患處宜置磁瓶勿令洩氣

清咽方 良方集腋

鮮臭花娘根數握搗爛絞汁濾清飲之凡咽喉腫閉者服之愈

治爛喉痧證效方 驗方新編

土牛膝根即臭花娘根秋間取之勿論多少水洗去泥打自然汁瓦盆晒熱將汁起入一調羹攪勻晒瓦盆宜多其汁不能過夜一日晒乾刮粉研細末入瓷瓶用時入冰片少許吹喉吐出稠疫即愈

外治異功散 驗方新編

蟹螯 四錢

眞血竭 六分

製乳香 六分
去油

製沒藥 六分
去油

上麝香 六分

全蝎 六分

大元參 六分

上梅片 六分

蟾蜍去頭翅足糯米拌炒微黃去米除血竭外諸藥共研細末另
研血竭拌勻瓷餅收儲勿令出氣凡遇喉症腫痛用此散如豆大
一粒置膏藥上左腫貼左右腫貼右左右俱腫並貼均在結喉旁
邊輒處閱五六時卽揭去膏藥有水泡用銀針挑破搯盡毒水能
消腫止痛惟此藥有毒切勿入口